

Atvinnuveganefnd Alþingis
Skrifstofa Alþingis, nefndasviði
150 Reykjavík

Reykjavík, 23. mars 2021

Efni: Umsögn um frumvarp til laga um tímabundnar endurgreiðslur til kvikmyndagerðar á Íslandi (tilgreining kostnaðarliða, eftirlit o.fl.), 604.mál.

Íslandsstofa og forverar hennar hafa frá upphafi laga um endurgreiðslu til kvikmyndagerðar sinnt því hlutverki að kynna Ísland fyrir erlendum aðilum undir merkjum verkefnisins *Film in Iceland* eins og fram kemur í kafla 3.6 í greinagerð þeirri sem fylgir með frumvarpinu. Undir þeim merkjum hefur verið lögð áhersla á að kynna Ísland sem hagkvæman og aðgengilegan tókustað auk þess sem reynsla og þekking íslensku þjónustufyrirtækjanna er kynnt.

Jákvæð áhrif af kerfinu

Er það mat Íslandsstofu að árangur af endurgreiðslukerfinu hafi verið góður. Er það í samræmi við niðurstöður greininga sem unnar hafa verið sem sýna að kerfið hafi jákvæð áhrif, bæði fyrir íslenska kvikmyndagerð og samfélagið í heild sinni. Verkefnið hefur fallið vel að hlutverki Íslandsstofu að auka útflutningstekjur þjóðarinnar og styrkja og bæta orðspor landsins sem upprunalslands vöru, þjónustu og menningar og áfangastaðar fyrir ferðamenn. Jafnframt hefur hinn mikli fjöldi erlendra kvikmynda- og sjónvarpsgerðarfólks, sem hafa tekið þátt í verkefnum hér á landi, styrkt innviði og aukið þekkingu innlendra kvikmyndagerðamanna sem hefur styrkt stöðu þeirra á alþjóðlegum markaði. Hefur þannig undanfarin ár orðið marktæk aukning á Íslendingum sem ráðnir eru til að starfa við erlend verkefni sem og dreifingu á íslenskum verkefnum til sýninga á erlendum vettvangi.

Íslandsstofa hefur þar að auki greint óbein áhrif öflugrar erlendar og innlendar kvikmynda- og sjónvarpsþáttagerðar á Íslandi í rannsóknum á áhrifaþáttum á ferðaþjónustu. Í skýrslu Ferðamálastofu frá því í september 2020 þar sem skoðuð eru lýðfræði, ferðahegðun og viðhorf ferðamanna árið 2019 kemur fram að fjórir af hverjum tíu ferðamönnum nefndu íslenskt landslag í hreyfimyndefni þegar þeir voru beðnir um að tilgreina hvaðan hugmyndin að Íslandsferð hefði komið.¹ Þá hafa verkefnið sjálf umtalsverð bein áhrif meðan á tókum stendur og hafa m.a. stuðlað að bættri nýtingu innviða í ferðaþjónustu utan háannar og utan þéttbýlis.

¹ Skýrslan í heild er aðgengileg á vef Ferðamálastofu: <https://www.ferdamalastofa.is/static/files/konnun2019/lokaskýrsla-2019-2.pdf>

Byggt verði áfram á árangri

Íslandsstofa fagnar því að til standi að framlengja endurgreiðslur til kvikmyndagerðar og þar með verði unnt að fylgja eftir þeim árangri sem náðst hefur. Íslandsstofa vekur athygli á umfjöllun í greinagerð frumvarpsins um að þeir framleiðendur sem njóta endurgreiðslna á framleiðslukostnaði veiti Íslandsstofu, henni að kostnaðarlausu, aðgang að kynningarefni sem tengist viðkomandi verkefnum. Sú heimild er afar mikilvæg fyrir verkefni Íslandsstofu og hefur nýst vel í þágu þess að laða frekari verkefni á sviði kvikmynda- og sjónvarpsframleiðanda til landsins sem og í annarri kynningastarfsemi.



Pétur Þ. Óskarsson,
framkvæmdastjóri Íslandsstofu



Reykjavík 23. mars 2021

21030087 SEP/GJJ

Alþingi
Atvinnuveganefnd
skrifstofu Alþingis, nefndasvið

101 Reykjavík

Efni: Umsögn um frumvarp til laga um breytingu á lögum um tímabundnar endurgreiðslur til kvikmyndagerðar á Íslandi nr. 43/1999 – 604. mál, þskj. 1031.

Ríkisendurskoðun hefur þann 18. mars 2021 móttengið tölvupóst þar sem óskað er eftir umsögn embættisins um ofangreint þingmál.

Í október 2019 sendi Ríkisendurskoðun Alþingi skýrslu sína um endurgreiðslukerfi kvikmynda. Í skýrslunni voru settar fram fjórar tillögur til úrbóta og í greinargerð með frumvarpi því sem hér er til umsagnar kemur fram að frumvarpið sé meðal annars lagt fram til að bregðast við þeim tillögum.

Verði frumvarpið að lögum mun Ríkisendurskoðun taka mið af lagabreytingunum þegar eftirfylgniskýrsla verður gerð.

Virðingarfyllst,






Nefndasvið Alþingis
b.t. atvinnuveganefndar
nefndasvid@althingi.is

Reykjavík, 31. mars 2021

Efni: Frumvarp um tímabundnar endurgreiðslur til kvikmyndagerðar á Íslandi, 604. mál

Samtök iðnaðarins (SI) og Samband íslenskra kvikmyndaframleiðenda (SÍK), aðildarsamtök SI, hér eftir „**samtökin**“, hafa tekið til umsagnar frumvarp um tímabundnar endurgreiðslur til kvikmyndagerðar á Íslandi (tilgreining kostnaðarliða, eftirlit o.fl.), 604. mál.

Samtökin fagna því að framlengja eigi lög um endurgreiðslur til kvikmyndagerðar fram til ársins 2025. Endurgreiðslur til kvikmyndagerðar hafa margsannað gildi sitt og skipta sköpum fyrir samkeppnishæfni íslenskrar kvikmyndagerðar. Samtökin vilja jafnframt koma á framfæri ánægju með það að í skoðun sé að hækka endurgreiðsluhlutfallið með það að markmiði að laða stærri kvikmyndaframleiðsluverkefni til landsins og hafa SÍK skipað tvo fulltrúa í starfshóp á vegum atvinnuvega- og nýsköpunarráðuneytisins sem hefur þau mál til skoðunar.

Samtökin styðja umrætt frumvarp og þær breytingar sem það felur í sér. Á fyrri stigum málsins gerðu samtökin alvarlegar athugasemdir við drög að breytingum á ýmsum ákvæðum, m.a. varðandi skilgreiningu á framleiðslukostnaði. Eftir gott og uppbyggilegt samráð af hálfu atvinnuvega- og nýsköpunarráðuneytisins við SÍK og SI hafa verið gerðar jákvæðar breytingar á umræddum ákvæðum. Þakka samtökin áheyrn ráðuneytisins og að tekið hafi verið tillit til athugasemda.

Virðingarfyllst,

Sigríður Mogensen
sviðsstjóri hugverkasviðs SI

Lilja Ósk Snorradóttir
formaður SÍK